

INUIT ATAQATIGIIT

Inatsisartuni



UKA 2018/151

11.11.18

Múte Bourup Egede

Sisimiut Kangerlussuullu akornanni aqqusinermik qimuttuitsulluunniit aqqutaannik pilersitsisoqassagaluarpat inuussutissarsiornikkut periarfissat suut pilersinneqarsinnaanersut pillugit apeqquteqaat aallaavigalugu oqallisssiaq.

(Inatsisartunut ilaasortaaq Peter Olsen, Inuit Ataqatigiit)

Nunami isorartuumi piffimmiit piffimmut imaaliallaannaq tikeriaannaagata inuuvugut. Imaatigut silaannakkullu angallanneq taamaammat pinngitsoorsinnaanngilagut aamma siunissami. Taammattorli attaveqaqatigiinnikkut imaatigut silaannakkullu periarfissatta ineriertortinnerisa saniatigut periarfissat allat aamma isigniartariaqarpagut.

Attaveqaqatigiinnikkut piorsaaneq siuariartornissamut ineriertornissamullu periarfissanik amerlanerusunik kinguneqakkajuttarpoq. Nunavissuarni nunarpassuit, nunap iluani, nunanut sanilerisaminntu taakkulu saniliinut aqqusinertigut qimutsuitsullu aqqutaasigut atassusersorsimallutillusooq imminnut tikeriaannaapput. Taamak periarfissaqarput naak ilaatigut nunat taakku iluminni imaatigut silaannakkullu angallannikkut imminnut aamma attaveqaqatigiikkaluarlutik.

Attaveqaqatigiinnikkut taamak ukiorpassuarni siuarsasimapput imminnut attaveqatigiikkumallutik, suleqatigiikkumallutik pingarnertullu imaaliallaannaq tikeriaannaanermikkut niuerneq pitsaanerpaamik ingerlakkumallugu. Attaveqaqatiginnermi eqaalliartortillugu niuernermut toqqammavissagissaarnerulersitsisarpoq inerisaanissamullu, soorlu inuussutissarsiornermi periarfissagissaarnerulersitsisarluni.

Naalagaaffeqaterput Savalimmiut ukiuni qulikkaani kingullerni aqquserniornikkut ilaatigut sullorsualiornikkut, nunap tamarmiusup imminut atassuserneqarnissaa anguniarlugu suliaqarput, ukiut amerlanngitsut qaangiuppata naammassineqartussamik. Nunatut ineriertorluarnissartik taamak anguniagaqarnermikkut toqqammavissillugu ingerlatsippu. Nuna kangimut sanilerisarput Island aamma qiviaraanni aqqusinertigut nunap iluani pitsasumik attaveqaqatigiinnikkut aaqqissuussifflusimavoq. Inuussutissarsiornikkut nunallu inuisa akunnerminni imminnut tikeriaannaanermikkut ataasisutut misiginissaannut iluaqtissiisumik.

Nunat qulaani taasakka ilaaginnavillugit ilaangnikkaluarlugit isumassarsiorfigilluarsinnaagigut Inuit Ataqatigiit isumaqarput. Nunarput isorartoqaaq, aap, piffit tamaasa aqqusinertigut atassusissallugit imaaliallaannaq anguneqarsinnaanngilaq, ilaannilu periarfissaagani. Taamaattorli aamma piffit ilaanni periarfissaalluartoq upperaarput.

Nunatta kujataani aqquserniornikkut pingartumik Narsap kommunerisimasaani savaateqarfiit akornanni misilitakkat pitsasuupput. 1960-ikkunni politikkerit taqqavani siunissamut takunnissinnaasut

savaateqarfiiit marluk akornanni aallartissutitut aqqusineqalernissaq anguniarsimavaat timitalerlugulu, soorunami piffimmi innuttaasut piumassuseqarluarnerannik toqqammaveqartumik.

Maanna savaateqarfippassuit aqqusinertigut imminnut atassuserneqarsimapput iluaqtigeqisaminnik. Inuussutissarsiutimmi ingerlatamik ineriertortinnissaanut akilersinnaanerulernaranullu aqqusineqarnerat periarfissivoq. Nunatta kujataani misilittagarineqarluartut isumassarsiorfiginiartigit, nunattalu sinnerani periarfissaqarfiusuni aqquserniornikkut inerisaanissamik eqqarsalerniarta.

Oqallisssiami uani sammisarput, tassalu Kangerlussuup Sisimiullu aqquserniornikkut atassuserneqarsinnaanerat inerisagassat piukkunnartut ilagilluinnarpaat. Periarfissarpassuummi taavani aqquserniornikkut pilersinneqarsinnaasut ukiorpassuarni eqqartorpagut. Timitaliisoqarnialerpat aningaasaliillutik periarfissap atorluarnissaanut piareersimasorpassuaqartoq ilisimalereerparput. Takornariaqarnikkut inuussutissarsiutitigullu ineriertorfiullualersinnaasumik.

Oqallisssiamik qaqitsisoq, Inatsisartuni ilaasortaq Peter Olsen qutsavigiumavarput soqtiganarluinnartumik tunngaviatigullu tapersernartumik saqqummiussaqarmat.

Nunatsinni attaveqaqatigiinnikkut aqquserniornikkullu misilittakkagut killeqarput. Taamaattorli nunatsinni periarfissaqarpugut aqquserniornikkut piffiit ilaanni inerisaassalluta. Nunarput aqquserniornikkut siuarsaaviginiartigu, taamaaliorta imaaliallaannaq pisinnaannginnera aporfiginagu periarfissatulli isigalugu.